



23. april 2024

Inatsisartut ingerlatsinermut maleruagassaasa § 37 imm. 1 tunngavigalugu matumuuna ukunannga Naalakkersuisunut apeqquteqaateqarpunga.

Naalakkersuisunut apeqquteqaatit:

1. Qanoq ilungersunartigisutut Ilisimatusarfimmi maannakkorpiaq inissisimaneq ilisimatuut pisortallu amerlasuut, ilisimatusarfimmik qimagussornerat Naalakkersuisut misigaat?
2. Naalakkersuisut tigussaasunik suliniuteqarnialersaarpat ilinniagartuut pikkorissut ilisimatuullu misilittagarluartut, ilisimatusarfimmiit qimagussornerat unitsinniarlugu?
 - a. Aappiuppat, suut?
 - b. Naamiuppat, sooq?
3. Naalakkersuisut tigussaasunik suliutinik aallartitsinialersaarpat, ilisimatusarfiup ilisimatuunik soraattaaliuinissaanut, tassanilu suliffimmi atugassarititaasut pitsanngorsarnissaanut qulakkeerinnissinnaasunik?
 - a. Aappiuppat, suut?
 - b. Naamiuppat, sooq?
4. Suna pissutaava nunanit allanit ilisimatuut, piffissap ilaannaa sulisartut amerlassusaasa taama appariartigineranut?
 - a. Naalakkersuisut nakuussutitut imaluunniit ajoqutaasutut isigaat, ilisimatusarfiup nunanit allanit ilisimatuunik piffissap ilaannaa tamakkiisorluunniit sulisitsisarnera? Annertunerusumik nassuialaarsiuk.
 - b. Ilisimatusarfik ilisimatuunut nunanit allaneersunut, ilaannakumik piffissarluunniit tamakkerlugu sulisitaminut nutaanik piumasaqaateqalerami?
 - i. Aappiuppat, suut piumasaqaatit aammalu sooq?
5. Ajornartorsiummut paasissutissanik allanik peqartoqarpat, taakku paasissutissiissutigineqarnissaat kissaatigaara.

(Inatsisartunut ilaasortaq Jens-Frederik Nielsen, Demokraatit)

Tunngavilersuut

Naalakkersuisut apeqqutinnut akissutaannut normu 57-2024 malitsigisaanik allanik apeqqutissaqarpunga, akissutit aarlerinartortaqaarmata. Naatsumik taassagukku akissutaasut tunngavigalugit uku aalajangiunneqarsinnaapput:

Pisortat maannakkorpiaq pisortanik qaffasissunik pissarsiorput, tassani universitetsdirektørimik aammalu institutlederimik. Ilisimatusarfiullu nittartagaa misissoraanni ilisimatusarfimmi pisortanut amerlasuunut tunngatillugu oqaaseq "atuukkallartussa" takusassaalluni – maannakkullu rektoriusoq aamma



atuukkallartuulluni. Kipisaqattaanngitsumik piginnaaneqartuartunillu pisortaqannginnera ilungersuummernarpoq. Allangorartuarnernut tulluussagassanullu, ingerlatat pisariaqartittuagaannut, suliaqarnissaq, siuttuuneq pigiinnarusukkaanni.

2020-imi ph.d.-mik ilinniartut aqqaneq marluk ilisimatuutut allaatigartik illersorsimavaat – ullumikkulli marluuniit pingasunut kisimik ilisimatusarfitsinni ilisimatuutut tamakkiisumik suliffeqarlutik. Sinneri ilisimatuutut suliffeqarunnaarsimapput – imaluuniit immikkut ittumik ilaanneeriaannarlutik ilisimatusarfimmi ilinniartitsisuusarlutik. Tassaluuku taakku inuusuttut, ilisimatuutut pikkorissuseqartut siunissami ilisimatusarfimmik sunniissat – taamaattumillu aarlerinarpoq, ilisimatuutut sulinnginnissartik qinermassuk allatut sulinissartik toqqarlugu. Taakkulu saniatigut – qanorluuniit pigaluarutta – ilinniartunik ilinniartitsisinnaasut ilisimatuut ph.d.-mik tunuliaqutillit ikiligaluttuinnassapput.

2022-imi ilisimatuut qulit nunatta avataaneersut ilisimatusarfimmi sulitinneqarsimapput, tamakkiisumik atorfeqartinneqaratik. Ullumikkut kisitsisit apparsimapput ilisimatuut pingasuinnanngorlutik, Nuummi najugaqavissuunngitsut. Ilisimatusarfik sunaluuniit avataaniit isummersornissamut pisariaqartitsivoq, ineriartortuassaguni. Ilisimatuut avataaneersut tamakkiisumik – ilaannakumilluuniit ilisimatusarfimmi suligaluarunik, aallaavittut iluanaarutaapput ilinniarfeqarfimmu qaffasissumut, ajornartorsiutit isiginiarnerannut nutaanik paasinnittaaseqartussaammata.

Apeqqutinnut akissuteqaat ullut suliffiusut qulit iluanni tiginissaat qilanaaraara.